

IL DIRIT DAL FRIÛL

O disìn che i furlans e àn dirit di vê l'autonomie speciâl prime parcech'e son furlans e dopo parcech'e son sul cunfin, e no parceche cun lôr e son sclâs e todescs.

In Friûl nol coventares ch'al fos nancje un sclâf e nancje un todesc; e son i furlans ch'e fevelin la lenghe furlane, e alore e son lôr une minorance linguistiche; ch'e son celtics, e alore e son ancje une minoranze etniche. Une minorance di cheste sorte e à dirit di sei rispietade e tal articul 6 de Costituzion al è scrit: «La Repubblica tutela con apposite norme le minoranze linguistiche».

E doprin pûr la lôr lenghe tai ufissis e pardut i ladins de Svuiszare! E àn pûr lis lôr scuelis ladinis chêi dal Sudtiro! I furlans ch'e son la part plui gruesse dai ladins - un milion in patrie e squasi il dopli pal mont -, e àn dirit sacrosant di viodi ancje lôr ricognossude la lôr lenghe de republiche taliane. Al ven a staj che ur spiete une autonomie speciâl imò miôr che ai sicilians e ai sardegnûi; ur spiete l'autonomie speciâl tanche ai valdostans e ai sudtiroless. E ur spiete l'autonomie speciâl ancje parcech'e son sul cunfin, par podê lâ dacordo cui cunfinanz miôr di ce che no puedi lê la burocrazie de republiche.

Se àn l'autonomie speciâl la Sicilie e la Sardegna ch'e àn il mâr atorvie, parcè no àl di vêle il Friûl? Se le àn la Valdoste e il Sudtiro, parcè no àl di vêle il Friûl ch'al è in cunfin cu l'Austrie e la Jugoslavie? Se le àn i trentins che no son sul cunfin e ch'e fevelin venit, parcè no àl di vêle il Friûl? Vadi parceche nol à un stât di là dal cunfin che lu judi a fâse dâ? E sares scandalose (ma e jè cussì! - n. d. r.); al sares tanche obleâ i furlans a cirî un stât che ju judi. Ise o no ise une cuistion pulitiche inmò prime di sei economiche? Al pò capile ancje un frut di tant clare che jè. E jè pulitiche ancje parvie dai sclâs e dai todescs ch'e son di ca dal cunfin, si lu sa; ma e sares pulitiche ancje se no fossin. E son e ch'e stein; midiant di lôr al sarà plui fassil discori cun chêi di là.

E no jè un bleon curt l'autonomie furlane; e jè une buine cuviarte che nus pararà pulît di une vore di malans.

(Partie dal Friûl - 4/2/1955)